

N gran detelpai a Marco Viola

La comunanza de Fascia ge à sport sia recognoscenta al dirigent del Servije mendranzes che é jit en penscion



Con la fin de november l dirigent del Servije per la promozion de la mendranzes linguistiches de la Provinzia autonoma de Trent, Marco Viola, à concostà i 40 egn de contribuc che ge dèsc l derit de jir en penscion. Jà a lejer la neva sul sit del Servije se enten che chest fat no vegn vedù demò desche n scempie e normal passaje de consegnes, ma desche vèlch che lascia n segn fon te duc chi che à abù l met de lurèr con Viola, che ti ùltime cater egn de sia cariera de dirigent provinzièl l se à dedicà a la mendranzes linguistiches.

L dottor Viola l'è stat bon defat de se vadagnèr l'atenzion e l cher de duc - e fossa senester fèr jù na lista de duta la persones, i istituc, la presidenzes, la sociazions che te na vèlch vida tel cors di egn i é doventé interlocutores de sie lurier - con na gran gaissa e con na interpretazion del dut particulèra del ruol de dirigent provinzièl.

Te chisc dis passé l'è stat n muie la ocasions olache Viola l'è stat envià per poder ge sporjer l developei de cher per chest so empegn. Na festa de cumià, dedichèda ensema con el ence a la colaboradora del Servije Lucia Maccani, ence ela ruèda a la fin de sie percors tel mond del lurier, ge é stata endrezèda a Trent. Coleghes, raprejentanc istituzionèi, esponenc de la mendranzes linguistiches del Trentin, ma soraldut amisc se à binà te la Sala Wolf del Palaz de la Provinzia per doi paroles de rengraziament, bilanz e cumià, e per na viva de bon augurie per l davegnir.

Te chesta ocasion l salut e l developei da pèrt de la Provinzia l'è ruà da la paroles de la assessora provinzièla Lia Beltrami, e Viola à palesà la sodesfazion per aer podù lurèr te na Istituzion che à vardà dassen de ge stèr apede a la

mendranzes. N braciacol de cher ge é jit te chesta ocasion ence a la d.ra Lucia Maccani e la paroles di "compagnes de viac" del dirigent à metù al luster la dotes de competenza, cultura, forza umana, gaissa, abilità, sens del doer, capacità de tor ite e de valorisèr l'empegn di etres, che à semper caraterisà l lurier de Viola, l fajan doventèr n pont de referiment per duc chi che te la realtà de la mendranzes de lengaz, no demò locales, i à abù l besegn de na direzion o de n aiut calificà.

N bel developei a Marco Viola ge era stat sport jà vèlch di dant te Fascia, en ocasion de la radunanza generèla de l'Istitut Cultural Ladin, olache l president Antone Polam e l diretor Fabio Chiocchetti, ensema con n chèder che met al luster l'architettura carateristica de noscia val, ge aea sport de bela paroles de rengraziament e recognoscenta, per la competenza e l'anteveder, ma ence per la capacità de stèr apede con gran umanità, metan i raporc anter persones dant da la burocrazia. "Noscia encèria - à dit Viola - l'è chela de ge stèr apede a la mendranzes, desche chi che porta la munizions ai sudé, ma l'è i sudé che cogn stèr en pruma linia, siede vo, che fajede pèrt de la comunanzes de mendranza, i atores protagonisc. Te chisc egn de lurier, soraldut coi ladins e coi cimbres - aea arjont Viola - é abù l met de cognoscer n muie de persones dalbon de valuta, che met ensema na gran competenza con na gran gaissa e estro de fèr. Chisc raporc personèi me à fat più rich e content, per chest cogne ve dir gé n gran developei".

L'ùltima atestazion de recognoscenta al dr Marco Viola é ruèda en mercol te la senta del Comun General da pèrt di ombolc de Fascia. La Procuradora Cristina

Donei ge à sport a Viola a inom de duc l rengraziament de vif cher per dut l lurier e i travers arjont te chisc egn ence de gra a so empegn. Apede a chi più emportanc a nivel politich, desche la lege su la mendranzes, n grum de projec e scomenzadives é rué a compimenc de gra a so sostegn, desche i viajes te la Catalogna e te la Val d'Aran per ge dèr l met a nesc amministradores de cognoscer la realtà de etres raions de mendranza, o la fradaa linguistica con la mendranza Achuar te l'Ecuador, demò per fèr doi ejempies particulères. N detelpai con mingol de escresciment é stat portà da la responsabola de l'ofize linguistich Sabrina Rasom, che te chisc egn l'è abù con l Servije na colaborazion strenta. Al dirigent de la Provinzia ge é stat dat en don na cobia de fascegn col guant, zipièda e depenta, acioche ge reste l recort de noscia jent e noscia tradizions. Viola à rengrazià de cher e l'è emprometù che l restarà amò vejìn al mond de la mendranzes, olache l'è troà na gran ricchezza de valores. L'à volù dapò ge sporjer na esortazion a duc i ombolc: che no i conscidre l lengaz desche na costion demò de l'Istitut Cultural, de l'Union di Ladins o de so Ofize linguistich, ma desche na costion emportanta che reverda duta la comunanza che i é chiamé a rejer. L'è n empegn de più, apede ai tropes che à n ombolc, ma l'è n vèlch de più ence a nivel de ricchezza, valor e sodesfazioni, de chel che i cognessa jir stolt.

Al dr Marco Viola duta la comunanza de Fascia, l'Union Generala di Ladins dla Dolomites, l'Union di Ladins de Fascia e la redazion de La Usc di Ladins ge sporc amò n gran developei per sie lurier e per ne esser stat apede chisc egn con gran profesionalità e gran umanità. (lg)



L dirigent del Servije mendranzes Marco Viola l'è stat rengrazià de vif cher da la comunanza ladina per l lurier portà inant te chisc egn con competenza e umanità.